



康對山先生集卷之一

明狀元武功康海德涵甫著

廷對策一道

弘治十五年制曰朕膺天命承祖宗列聖之統以臨天下于茲十有五年夙夜兢兢思弘化理非法諸古而不可然嘗考之前代繼統之君守成稱賢莫盛於夏之啓商之中宗高宗周之成康之數君者治績之美具在方策果何道以致之近世儒者之論謂聖王以求任輔相為先又謂君之聖者以辨君子與小人

聖山集卷之一
數君之致治也其亦有待於是邪且輔相之賢否君子小人之情狀未易知也茲欲簡賢為輔用君子不惑於小人將安所據邪天下之務固非一端以今日之所急者言之若禮樂若教化若選才課績征賦之法兵刑之令皆斟酌于古然行之既久不能無弊焉祛其弊而救之欲化行政舉如祖宗創制之初比隆前代何施何為而得其道邪子諸生積學明經通於古今之宜其其實以對毋隱言毋泛論朕將采而行

臣康海對曰聞天下有不可易之道而常獲於人主有不敢易之心蓋天下之事未有舍道而能集者而道固不可易也心之所向道之弘否所關一有所日勿則所以脩乎身者必不能實用其力而道之在我知之不明守之不固甫遷於此或復於彼雖欲勤勵以求治而弛張予奪一無所據窺伺媒孽之輩共起而乘之雖有賢人君子立於其朝漫不相信甚者或斥譴罷去不為之所天下之治將焉所賴而成乎惟有以真

知道之不可易其心常憂勤惕厲而不敢以一毫苟且輕率之意雜之於中擇之必精執之必固使用人取善各有定則賢否莫吾亂而君子小人不相尤既得其人而任之以事則政無不舉而法無不振天下之治宜無有不成者矣古之人君未有不達於是而能致其治者也亦未有徒達於是其心終有易焉而能以無弊者也

洪惟

皇帝陛下以至聖之德撫盈成之運十五年來民安

物阜雖堯舜禹湯文武之業亦不過此而策士之詔乃猶惓惓焉以化之不弘治之不洽為念陛下豈誠有未達於是而猶待於問哉臣有以仰窺聖心之於道固有不自易焉者也臣嘗謂古今豪傑之士不得所遇雖子思孟軻之流亦且徒爾而臣之庸昧乃際遇若此臣敢有所諱而不言哉臣惟天下之深患在於久安極治而機括所不見者莫為之虞

陛下夙夜兢兢思弘化理此固宜也然用於已不若資於人求諸今莫若法乎古古之君心純乎道

未嘗敢以為易故其用人行政有非後世之所
能及如啓當禪授之後繼禹之業守之以敬而
伯益之用終始無間故道之得於禹者無廢墜
不舉者矣中宗高宗一切信任陟扈傳說之屬
而又本以嚴恭寅畏恭默思道之心成商之治
夫豈無所據邪殷之頑民雜於管蔡武庚之手
武王之澤未洽也使非悔悟於周公篤信於君
奭借有成康繼序不忘之思旌別淑慝之意而
禮樂之化豈能如詩書所道哉程頤曰聖王以
求任輔相為先歐陽修曰君之聖者以辨君子

與小人蓋政以人而舉人既存則政自無偏弊
不舉之患而治之在天下者可成也

陛下欲求數君致治之績獨可舍此而他務邪亦惟
有不敢易之心而已天下之政孰有出於人主
之心者况用人之際又其本原所自之地哉

聖制所謂簡賢為輔用君子不惑於小人誠灼見其
必然而憂勤之心有不能自己者也蓋大君為
天地之宗子必有大臣以為宗子之家相相之
職所以輔養君德而贊成政化天子不可一日
無者豈惟夏商周為然臯夔稷契之流雖堯舜

之世亦不可無也若其賢與否則必辨之於先而後可任之於後苟辨之不明用之不當則天下之禍反有不可言者矣何者以匹夫之賤而上與天子共事其所為操縱予奪者無一不為天下之所稟受使心術或不正而學識或不醇則其所壞非如有司之一節一端而已故必先有不敢易之心然後修之身者無往不實修之身者既實則出乎我者無乎不正而人之邪正自無所匿於是擇其賢者而用之則輔相得矣臣於

今日豈以不得為憂哉特恐心所以待之者不至爾

臣在草野間聞

朝廷用一大臣必極聳動以為諮謀親信將必有出於恒品之外今上於

京師乃或有未然者臣願

陛下為之禮下務得其心而使盡其職凡遠猷大略不為群議所詘一政一令必與之深言極論而後布則小人雖欲肆其無所忌憚之私以惑吾聽而其情已先覺矣蓋小人之情不過趨利避害去其所惡而求其所喜者而已然亦必掩之

而不甚露故利之來或遜且謝之害之至或以為所分且蹈之夫辭之不力則得之不固受之不力則去之不決及利害至於必不可已則亟去與取之恐後也方其有所勉而為之也其卒不可掩者已躍然於其言悅色之間即此試之小人之情可復遁乎既得其情則宜亟去之去之不亟則或為他巧所中而猶未免於有惑隨有即覺隨覺即去如是而已如是則君子小人不相尤君子小人不相尤則動無所妨而天下之務自無疑滯不舉之患矣臣請以

聖制所及數者言之禮樂不可以一日無此萬古不易之論然其興也雖專重其實而亦未嘗遂棄其文臣竊見近之所為禮者踈簡縱逸雖所謂儀文之末亦未之有所為樂者殘缺廢壞雖所謂聲容之細亦未之備蓋不得其本而安於苟且將就之習固如是也苟學校之教有以振作而興起之則人心自無不止之欲而其情自無不和之發凡見之宗廟朝廷鄉黨之際自有以去其踈簡縱逸之習而補其殘缺廢壞之弊將不俟於進退升降而節鍾鼓羽籥而和矣禮樂

有不與者乎至夫教化之所在其機係於人主之心而其應屬之天下之廣萃英俊之士使之群遊於學讀書窮理且或莫為之變而欲啟天下之愚民使悉歸於禮讓和樂之域固已難矣莫若先以恭儉忠厚躬行於上不為聲色土木貨利玩好之所移易而後徐以示於天下天下方以前日之侈縱相安而一旦之所聞見乃如此其心亦必悚然以思冷然以省苟一二大家巨族頓悟而倡改之則人之樂從者衆矣選課之法則臣於此有所深惜

祖宗之於士養之以道義而信之以賞罰其用也不為之拘而其課之也幽明殿最各為之等故人皆勉於其官而優於其事比者稍有兵荒而納粟買官之人已滿吏部之簿矣雖有才德滯於所用之期用未及而顛毛已號種種能以壯節自勵者會幾人哉又况黜陟之施一惟流品是視苟不本於科甲之選高官重秩未肯輕予則彼無所慕於中者又安有所忌於外哉臣願嚴其僥倖覬覦之禁使冗懦不職之徒一一謝去選惟其才而不盡拘流品試之以官而課之以

實如蘇洵所謂某人廉吏也有某事以知其廉
某人能吏也有某事以知其能然後因其最否
以加賞罰天下之人望以其才自見者亦將知
所變矣征賦之病大抵冗耗過多而司會莫為
之省非司會之不省勢不得也自京師言之食
之仰於江南歲數百萬而權勢所畜無藉之輩
不為國家分寸之益者乃至百千借其空名以
耗實費至有水旱饑饉之變則又加倍以取於
江南之民臣聞土日窟則陷繼之江南之民貧
甚則江北可晏然以不顧乎况今邊境之擾未

甚安帖前日榆林大同之役馬死食置所費不
知幾千萬而無用之兵又坐食於邊山陝之民
丁運之法無不備舉老幼婦孺流離移析外患
未除而內地已困寧不為可懼邪臣欲去冗耗
無用之費而革權門招集之弊息江南之民以
固根本邊境之擾但以付之良將不用統制之
屬帶挾僥倖之徒以耗軍食而又復屯田之實
省丁運之苦用固無不足者也兵則先於生養
安息之間為之深計使不受役於私門而得給
其俯仰奮迅矯烈之氣又必常振勵之使之無

所沮喪今有一級之勞而大家右族誦謫奪去不敢仰視將何所養以自奮乎况夫新舊逃流之兵方以官法逼之復伍金爨之用俱無可克又其君無親戚往來之接其心之欲去已甚矣衛所之官又以嚴刑深計鉤取其有彼方有欲去之心而此又逐之使去逐矣而不去豈人情哉欲兵之強而二者特不之詳臣所以深慮也刑之際洞照物情而不為所誑明者皆足為之而法之輕重則有一定之制既得其情必為之斷使貴賤無異施豪右寡弱無異決則令

所出無不從天下之奸當必隨禁而革蓋天下皆天子之民刑期於必戮賞期於必得不待命而後知者也豪右之徒有所倚仗得以自脫而寡弱之人駢首就死人之情孰不畏死而不求所以自脫哉此尤

陛下之所宜置念者也夫數者之務酌之於古而行之於今宜有不可易者而其弊猶若此

聖制所謂祛其弊而拯之欲化行政舉如

祖宗創業之初比隆前代者豈有他哉亦取諸人而已孔子曰為政在人啓以下數君不過中才之

主一得其人且足以為治而况

陛下神聖天縱出於尋常萬萬者哉然臣於此竊有說焉蓋政雖舉於有人而身則所以取人之本故孔子又曰取人以身欲得人而不先修乎身是其心之所存輕忽率易不能不累於愛憎之私而用所不當用舍所不當舍者有矣臣願

陛下急於修身以端取人之則然所以脩身者又非勉強矯拂之所能致必自君臣父子夫婦昆弟之間以至於動靜語默一事一為之際常加儆畏內省于中果當於理而不悖乎果非其當然

之則而狃於外誘乎使天理純明私欲淨盡則身無有不修而道無有不盡酌酢斟酌自不謬於天下之是非苟用乎人其用必當苟發於政其發必精治功之隆必能追配

祖宗卓越古昔而有詩書之所不及載者矣彼漢唐宋區區小補之治又惡足論哉然臣又聞治不患於始之不得而難於終之有繼伏惟

陛下常存不敢易之心以守此不可易之道則

國家天下之幸非獨臣之幸也臣無任惓惓忠愛之至臣謹對

太微先生曰對山論文以理為主以氣為輔出於身心措諸事業加諸百姓有益於人國乃為可貴觀此策切於事務曲盡情理不止一世可行雖百世可也其論君子小人尤人之所不能言而不用統制之說尤為安邊至要其論財賦兵政二者之弊與救弊之策真鑿鑿可行哉

武功縣知縣曹崇朴督工騰藁

對山集卷之一

康對山先生集卷之二

賦七篇

夢遊太白山賦

余歷覽載籍所志古人之辭由屈原宋玉以來不可勝計而浮靡侈放之辭益托諷寓興者之所共趨上林之後益蕪益漫亡能爾雅志士之所賤也余感風人之義因夢遊太白山歷見竒瑰駭異之狀孚于人言退而作賦凡若干言雖極假借要皆自喻其迹少有虛謬諛駕凌絕之病示諸同志皆曰可錄弘治閑逢攝提格終相之月康子夢遊太白與金子

可卿乘馬領僕各執糧糗飫飼之物浮漆渭跨郿塢
環博物逾武功去約萬里四望塞蔽恐怖猝突惶惑
震厲若將遂為虎豹之噬有老人者雪髭鶴髮電目
龍顏自西而來若愛若識請以前路則笑而不言少
頃復去金子曰若非山川之精耶豈將疑我以迷晦
顧我以虛誕也乃躡以其後則豁然四開巒回徑折
泉下雲散予曰是未可止也夫八紘之廣獨有太白
盤礴崦嶷瑰嶂崎嶇神靈秀明嶂嶺峩嶩夫是但謂
未麓近壑然未邃也乃與虬蜒亥石轉附垂藤升矚
巉壁靜嘯絕岸忽萬里之瞬側何溟渤之未窮雜卉

菴葱石泉沸騰嘉樹駮乎九御神風颯乎太紘駮駮
散乎銖粒蛟螭視乎細繩電光恍乎山足雷聲浩乎
廣聽零露凝其在衣松濤悠乎啓轂金子曰快哉遊
乎夫造物者假我以聖智崇我以令德我弗用觀柰
此膚景遂直詣而不回何茫迷之勿騁乃爾若神物
之可憑歷千岩之邃嶺山石儼乎華嵩細流浩乎滄
溟蓬蒿翳乎峰壑墜葉震乎雷霆老人跨鶴從雲前
下笑曰異乎子之善勇也夫太白始峯炎暑冰沍萬
夫之勇亡有敢及况迨於是夫是泉脉應乎坤軸遮
飾極乎越區天高邇乎可轂神祇恍乎可呼至循崖

之前重谷之裡百鳥不宿神獸亦避雖至人亦蔑有
入也越此百里西下陰壑復關峻岳則金屋龍棟控
亢聳搏異花雜乎瓊瑤僊風冷乎清綽靈芝馥乎滿
郊麒麟馴乎盈郭龍蹇屈於平池鳳翮聯於長漠此
則上帝之秘區而太白之關鑰也其東百里瑤宮蒞
殿萬戶齊啓蒼光青氛四回周起函丹書於億笈紛
朱絃於兆徵散靈籙之如斗歷綺轂之竒靡總百綵
而具存奚瓊桃之如纍此又太乙之宅合陽之宮至
其南也朱雲陸離丹閣霽霽神桂宿日南極奉塵羽
翰極乎麗暉珠貝極乎雕飾鵬鷲駕而鳳軒鯨鯢御

而兕履是謂朱明之宮天帝之闕北則至幽號曰方
府紫微之所宿萬象之所聚玉臺瑩光冰柱炫色珊
瑚如林水晶四徹雲沆瀣而守默氣鬱森而馳起靈
龜玄龍參錯其下松檜接乎帝閣金碧曳乎泉石翼
八獸以守衢役百神而司臬夫皆五天之至精萬化
之樞紐能有至者皆必具靈負秘與抱圖膺錄之士
有天人德者也已而風柔香墜路豁視空若雙龍
之負引倏靈宇之就中僊姝麗乎兩間洞簫錯乎萬
笙皓歌凝乎飛泉朱絃颯乎翠空座列煥乎雲端境
象委乎穹攏環珮鏘乎旖旎禮數儀乎動容予乃攝

堂山集卷之二
衣升堂長揖就位悟人世之囂紛歎靈禱之皇闕乃
與金子終身同丈人居之不去

嘆潦水賦

甲寅秋九月余南望綠野書院時秋序已闌微
雨新霽丹楓載塗青岑彌望同遊諸生各論往
哲務極鋪叙然而渺茫無實不能近道康子憂
之感時序之不回即潦水之將逝作潦水賦
嗟昊天孔明何人生之斯佃渺歲月以延佇迎塵
靡而不回務談說之相軋汨理道之醜頽昧明德之
輝耀弗崇高之自媒粵山木之葱蒨亦直遂而上推

矧儀宇之修如系實上帝之所開非栝櫟之矯偽何景
景而就痴願曰托之修固指往迹之虛詆嗟蘭茝之
微細乃托迹於崔嵬何斯人之靈秘願放蕩而無核
羗撫景而長云惡望聖哲而取裁用省惕於同志願中
孚而不猜嘆水之弗久嗟狂瀾之易摧倘實際之
未悟終事業之未恆也

憫志賦

嗟嗟余窮兮孰余之厄余行欲脩兮予處之索一裘
弗完兮糠粃曷擇冬長寒冽兮暑亦奚給上帝孔惠
公既昭予宅曠而弗居兮實予之責嗟彼高人兮胡

有不獲予曷獨難兮有行必畫歲月不留兮憂心如
劃嗟彼朋友兮各謀爾懌吁嗟柰何兮孰予之格達
人不逢兮自彼古昔匪予一人兮烏敢不措

觀漲水賦

嗟秋霖之乂注何逝者之感懷漲支川而椽拆浮寰
宇而移推走阜石於原陸泡大厦於卮杯殼號徹乎
九關勢摧倒於八垓細涓波於帶縷夷海水於塵埃
但奔雷之奮迅奄轉山而傾頽方馳邁於澎湃寧委
頓於滌洄傷人謀之不穀詎鬼物之相駭或漸殺以
微細將長托以竒侈美質委而不陳芳辰隔而空哀

別知賦

楊子將北上京師其友王子贈之以詩情素舒矣又
以書請濟西子賦焉濟西子曰噫嘻子大夫西仕關
輔展采宣猷振綱肅紀遇既盛矣遊亦麗矣比其別
也迺其心依然其聲嗚嗚然予竊隘之夫以子大
夫嶷嶷高尚之志不相規以道義期望以賢聖乃若
兒女子之歔歔嗶啗追是非子大夫所聞于天下之豪
俊也王子曰子之見細矣聖人不違情以立化智士
不詘顯以廢幽夫楊子者天下之士也予承交于楊
子由關輔所紀幾三禩矣所以益其不能勉其脩勵

者不可勝道今楊子去我將占膺仕于

天子之庭而予孤處於是過則孰規業則罔勗吾是以傷之悲知音之遠慨遭值之難也子何以是為細乎蓋子之所未喻也許西子容愧色赭稱謝既久於是掇王子之意于篇著別知賦焉辭曰

若有人兮居玉京覽德輝兮振長纓下天閭兮躡滄海集昌朝兮辟明刑申皇度兮肇修服試群難兮見攸躅歲悠悠以三改仁熙熙而四覆轂炯炯以延被誦洋洋而表暴歎始遇之咸怡矧久要之云穀居依依以剗切動戀戀而追逐若鄒萍之就礪若楹垣之

待築肆笑言之敦合乃情性之相伏何斷金之足稱奚如蘭之可衡繫睽違之殆及心耿耿而怍怍覩逝景之難追傷歎曲之莫乘驂命駕以並往悵官度之有程中惶惶而沾濡志靡靡而弗寧於是抽鬱陶之幽思兮冀以道乎情悃曾怛怛而罔暢兮顧多憂之予沴倘積憤之未宣兮雖有言亦奚盡乃濡筆而申愫兮曰載卜于詹尹借他詞以命意兮亮余度亦丕近於是走下吏布肝膈陳分誼寫紛結托予知以載歌倡驚翳而為別魂怵物而長引情懊懷而靡悅辟蕪詞以長跼要中行而敷說愛何為而有先憎安繇

而妬愜抑嘉會之鮮常斯有聞於先哲苟畢志以自
強雖燕秦而豈隔亂曰煌煌鳳飛將安底兮悠悠周
道顧余履兮昔胡以同今胡此兮君子之義慎自矢
兮亢旣靡揚汚終俛兮敬爾威儀民將軌兮言執子
手且相歧兮端履炯逝惟汝惠兮懷以好音神用媿
兮

後別知賦

劉使君來京師復領西安太守將行余為賦贈之命
曰別知辭曰

陟崇阿之蕭爽覽遠道之渺茫
嗟黃落之委壤驚時序之有常
何人生之會晤乃歎歡而弗長
思白首之迤邐曾忽散而靡諒
覩行李之畢戒慘絃索之具張
彼夫人之遠遊固帝命之攸行
徒徘徊以却顧寧名實之奮揚
苟皇輿之既定雖睽阻以曷傷
况匏瓜之在俎奚丈夫之可忘
駕四牡以馳邁願萬姓之允康

止酒賦

嗟日月之昭晰兮從古而然
五緯錯陳以建象兮秩三靈而畢宣
曰人惟當其精粹兮云操約而履寬
姚姒知命而盡性兮繇世萬以稱賢
繫余胡舛以無良兮忱特罔於天年
飲汎濫以忘迈兮殊莫知來者之

艱難也借曼顏艷舞之魯竒兮亦已久迷而可還也
彼衆人嗤嗤以罔覺兮尚切有憂乎瀰漫矧伊修靈
之是稟兮羗則靡對於前言亂曰行自我趾其尤誰
兮往者弗諫今已非兮春甕浮蛆良可懷兮從德而
安欲則危兮沉湎忘反惡奚宜兮古訓昭昭我則違
兮二毛種種此其垂兮逝光不回寧無悲兮

對山集卷之二

康對山先生集卷之三

古詩十篇

迎神湫歌

神湫來雲油油降甘雨沃田疇荷靈貺倏有秋稽首
拜迎神休

神湫來雲田田降甘雨洽原川荷靈貺倏有年拜稽
首謝皇天

祈雨歌

日曛曛雲渺渺秋不登夏亦槁皇天不吊民為孳乞
甘霖拜靈昊

天降雨倏滂沱沃我田嘉我禾民不飢否帝惠多感
稽首望靈歌

秦侍御鸚鵡圖

朱光聿起百物言滋被此文羽千禽之儀我依在木
灼灼其華我鳴弗長朱光柰何

悔過詩

徂齡不來謝景詎待覆杯莫收燼灰罔再青春隆隆
白日杲杲自飭弗勤如彼蔓草或潤而達或暘而衰
緝而熙之非予則誰予自謝黜益驕以倨心騫志翔
曠視萬世哲人則敦愚人則疚匪愚之疚予惟斯謬

眷令知風鴻雁知冽賢則恚昏旣安有竭徃或弗知
今已甚明逝茲靡創將大且橫武公戒抑夏祖畏口
繫彼喆人胡寧不守班班虎皮言設之几交交繁言
道則何理尼父惡卵誅以司寇舜憎四兇位在元后
孰云齊民乃怨乃慝若彼水木旣發必克 皇運廣
大布德商周閔予置予祖考之休日月方長德輒云
坦伐柯視柯其則豈遠季春壬申日在辛酉式歌不
支可以永久吾言罔反爾行孔棘君子攸崇是戒是
力

貽鳳麓子

我友鳳麓於今念年衆口鑠石惟我知賢方履曠目
若凌九天蛆視萬物驚志占先閉門著述刻意太玄
暇則執耜躬耕漳川時藥執木沮溺比肩知予避世
厭居市廛時過澣西究此群編敦德敏學守方智圓
今日壬子燕爾東田博觀古蹟載濯長淵情熙意暢
蔚若遊仙我詩贈子興以言宣世萬弗斲清廟朱絃

送閻公甫

表弟公甫刑部以公事便道省墓於馬嵬就過訪
予澣西別業居五日情誼洽矣倏焉將別公甫曰
弟不敏願有以承兄之教得寡過焉予往與公甫

語高不抗卑不污意遠而弗荒指近而不淺奚俟
於予言而後能寡過者然公甫之意則歆然若無
也於是為之說曰於乎今之所謂士大夫者於古
人之道莫不誦習愛慕以佩之於終身至其見之
行事則與古人不啻秦越不相及此無他不得其
旨趣臨時倉皇不覺自眩故遠則驚於荒近則詘
於室蓋徒欲以抗為高以污為卑又惡能與古人
似也公甫勉哉中庸曰脩身則道立親賢則不惑
夫欲自立其道非親賢則理不得而道晦晦則惑
惑則無所往而不窒予重恨世之士大夫竊古人

之迹肆危峻之論不能近求厥旨以自窒也是以重與公甫發明此意凡以欲公甫努力於是而已聞公甫在京師所與交皆長厚敦樸之士今之所論已槩見矣公甫勉哉孟子曰君子之言也不下帶而道存焉道固未遠夫人也欲遠人以為道斯子思子所不取矣士大夫何憚而為危峻之論以至離道之遠哉公甫曰溥不敏請若兄之言於終身今而後或得以寡過矣於是又係之以詩曰昔余戎祖嘉爾大父迪德履仁克循厥武文定其祥妻我太姑允翼允嚴自求多祜耀德昌朝埒名伊傳

墜羽中行談笑靡顧若珠在淵光燭彌驚沐風茹休良士如赴遺文在編厥聲載路凡我後生畢遵其步其遵伊何匪直其文信道罔飭雖和不群大雅既亡光範式存眷予小子爰視前聞契肖雖忝影響必敦肆當弱冠其從如雲嘉惟吾弟其學克勤總角於變靡有不臻馬公善鑒於弟猶云少宜加養必配古人凡余話言必信且珍放弗謂免顯詎肯因我閭中躋予憂寔勤恢時續祖聿大厥門赫赫燁燁卓有令孫分署西曹執平靡駸靖恭是隆堅白必辨武既不吐柔亦奚先道立譽長君子是羨奉詔西邁事無弗

練予駕言東肅承清燕折旋孔佳紛糾斯剝回思馬
公言豈無見 天子明聖方事安奠欲匡厥猷微
汝孰彥我思古人溫恭允塞惟弟其念往焉若畫繫
彼哲士前軌孔赫克念則然罔念則刻藹藹碩人莫
不是則發言不程逸軌棄轍恒悝未融惟隱之願卒
底顛覆奚益安宅子返舊曹為 天子使祛爾繁
細允欽厥位勿覲狂斐篤操秉義用光爾祖以畢初
志濟西峩峩漆沮湯湯握手載歌其風肆長酌以大
斗佑以兕觥子不予醜尚繹勿忘

贈楊秉衡

正德九年二月一日吏部以浙江按察司缺副使
聞 上命知漢中府楊侯往漢中府同知何子奇
自朝覲歸屬余為詩表之文旃以贈其行夫蒸民
之作自彼古庸由來既久祖述遂繁楊侯恢德博
才嘉政實德漢民懷之如厥慈母宜不可忘遂為
之辭曰

皇明丕興八表咸一已已以來萬民罔謐由蜀底冀
至於鄒密焚蕩猖獗處無完室六載番番其劇惟漢
川陝荆襄師旅巨萬民既化離盜益滋蔓士無宿糧
將徒永嘆時哉惟侯其德孔惠桓桓發發何有弗濟

簡我民役咸平靡矣息我民苦巨細必計賊已悉定
侯乃云遷繫侯之恩漢民是天老幼婦子祝侯萬年
侯往雖亟侯心則懸漢民誰庇漢土安澤小大成想
侯車已策板轍留侯帝命孔赫民為侯泣侯為民咋
其泣匪他感侯如天在昔兵燹流散顛連影以形弔
情與事煎杯水療渴盂飯理餓大惠若此民將焉那
懷侯豈諛歌德周過侯惟保哉下民之賀侯才甚明
侯請孔直學非遜辭心豈雕筋至孝窿窿斯民是式
彰善殫惡侯度允得漢水湯湯四月維夏百姓送侯
于彼江下何君率祖典禮攸攸風微氣和觀者盈疇

帝德日新侯乘當重霸既登樞憬允資用公德不回
民心所共欲知休美第觀茲頌

太白操

太白兮何為日中兮揚輝昊天兮孔明我陳兮誰聽
徘徊兮路窮自顧兮傷衷

當歌絕絃

余懷佳人兮山川間之當歌絕絃兮余心孔悲芳年
不再兮容華易衰咄嗟時命兮噫將尤誰

握手歌

春日遲兮景芳鳥鳴咄咄兮孔陽與君握手兮相將

前度飛坂今後岡同心之音兮自長矢中夜兮未央

雜調十五篇

能官行

官能不在吏吏巧還殺人今之官長愛深文蒸黎轉
徙徙紛紛君不見李斯未死陳陟動赫赫秦威竟何
用

夾河戰

故崇安侯譚淵隨

文廟內靖至夾河御

幄有虎來犯淵引弓射虎死明日大戰淵死
疑虎為淵元身謂不可射歸諸理作夾河戰

夾河戰事已亟張御幄虎來逼將軍怒目射虎死來
日沙場身且殪元神之說古亦有將軍之射乃其守
可使身後殪毋使虎前走君不見軍中壯士空千萬
倉卒虎至無人見眼底不知報主恩何況明朝夾河
戰

寧郭尉

寧郭尉勢如虎夜逼人至亭午手持黃紙呼御符前
村後村尋遞夫遞夫盡逃妻獨存家家背縛敵欲吞
尉家有母亦有妻人生百事難比齊君不見西山食
人虎牙爪亦何惡有時不自雄卒為人所縛果然卒

為人所縛舊時牙爪將安作

鴈門太守行

城中起風城外霏雪豈無裨袍胡來則劫嗟嗟柰何
胡雖劫我袍室猶有粟胡今不來粟則無有嗟嗟柰
何負戈出門可以殺虎執皮我役不敢惰吏反捉我
嗟嗟柰何皇皇車輪皂隸在御聞有太守來也今日
胡不劫汝吏不捉汝也柰何嗟嗟

古倚歌

樓上喜風樓下苦寒廣衢修路何時還與君酌酒看
朱顏車馳馬驟各有歡逝者如斯倚長嘆安得此身

雙羽翰飛遊逍遙浮雲端

雉鳴曲

梧絲長井絲短朝出門去夜歸晚妻死無食食樹實
為我謂妻令之返妻去不我顧兒女牽衣啼入室何
所見徘徊看故衣看衣不覺卧繞階脩脩鳴雉飛

送楊用之還武功

東風失意悲芳草歸人西出長安道長安道上車馬
多空使韶華望中老君不見舊時同遊者紛紛曳縞
向長安嗟君尚爾誤儒冠袖中龍劍應如昔何得愁
人白眼看

涇野子與余居既數日陟降原隰臨眺川陸二
美具集百情咸暢辛丑之夜宴歸學宮風雨
忽作因秉燭相對慨然興懷擊筑長歌悲婉
激壯之聲古之志士未之能或先也因倚而
和之如此固已媿涇野子之所陳矣

噫嘻嗟乎子之來縷縷兮邀不能遘覲而將復吾誰
與兮鳴泉湔湔愁人心嗟尔歸旦夜苦長吾心獨悲
兮誓將羽翼摩天飛懷子以好音已而已而東方離

與呂子發許西

蒼雲爛白日長並轡遊駢曲房君去不來我心傷山

寂寂聞無侶愁檢故詩歷孤嶼孤嶼亭亭當大河下
有萬尺之洪波洪波萬尺有時盡此意悠悠君若何

同仲木往許西別業

春日遲兮景芳鳥鳴喈喈孔揚與君握手相將前度
飛坂後岡同心之音自長矢中夜兮未央

相逢行

汝從雍州至我自華山來秋風木葉落相見含元臺
管絃蕭瑟不可聞子奏伊州何壯哉半月不飲長安
酒因爾立空三萬杯繁華自古易衰歇歎尔風流倚
旄才

歎息歌

歎息復歎息歎息如何及伏雌抱鴨誠有然螺贏祝子
真堪泣渠顧為鴨君為雞那憶行年已三十撫育豈
因薪水勞紛拏反使肝腸繫畜犬解尋主畜猫可禦
鼠老大還無寸艸心此輩成人在何許世事悠悠着
力難憑君不必苦憂嘆早携藜杖過蓬華同去東山
訪謝安

楊白花

人生須遣家富豪黃金不多名不高韓信乞市丐人
悔世間誰肯為爾曹前年脚夫王仲深今年處處稱

官人權家貴客滿戶入舊時行輩何足論君不見楊
白花一朝風起滿天玉世上榮華誰是足

古別離

君不見邊西戎子夜走馬釋轡直前人盡下又不見
洛陽少婦夜深哭丈夫十載龍荒宿古來緝邊如緝
網願得將軍如李廣

古邊城曲

胡人騎馬來邊城滿城痛哭無寸兵眼前不可保旦
夕春深况敢思深耕黑頭將軍徒自雄旗竿半偃城
半空天王日日修武備閨中夜夜傷夫婿

望山集卷之三

康對山先生集卷之四

五言古詩

觀史

漢武負才畧天廡育駑駘
 俳視東方朔却築望海臺
 士抱千里姿不得凌九垓
 仙人王方平往往笑其駭
 讀書窮巷中志閉履難諧
 不如屠沽子乘時際風雷
 丈夫各有遇胡為卑艸萊
 君看吳王門亦能老鄒枚

三年

三年不相見相見轉愁絕
 來自庭中門掩淚聲哽咽
 羅衣如輕絲盤縈止堦側
 初言睽違長次言懷想切

君為天上鴻安如風中葉影泊無定所素體待淪滅
後會難再期茲已生離別欲語聲復吞衷腸宛如結
願為雙燕子營巢傍君宅朝飛看君出暮飛望君歸
滄海有窮日此心終不違

枚壺聯句

仲秋天氣佳秩秩萃賓友薄東風漫拂簾花影重篩
牖堂前列犧尊堂下歌貍首馬獻酬良足歡成禮非
獨酒主人思序賓枚壺為賓誘康三讓尊典常一發
嗟群醜馬或褊釋筦中或連於雙紐康或韻如佩環
或拽如科斗馬倚頤跂獼猴揭注倒泉溜康橫斜林逋

梅貫穿養叔柳馬偶同匹雁飛隻比阜駟走康卦畫
伏羲心字製蒼頡手馬蓮花垂青荷蘭莖炷綠斗康銅
壺恨偏長金鐸愁風颺惟驅敵面頰不薄眾掩口電
鼓響弗勝司馬益赧赧馬居然豐上觴盡為負者有
勝氣凌天雲群英若推帚歡聲匝四筵賓主具單厚
康已而睠庭除明日照尊俎馬

病已二日又作皆視舊作增劇醒後再成

生死一何易直當反掌間氣散收鬼錄安問跣與顏
百歲無遠期瞬息如轉圜所貴良士心積芬不崇姦
遭值忽如此天道宵難攀側聞老母淚撫膺方潛潛

十月十一日病中示婦

逝水無回波氣散我當歿與子同衾稠相期至白髮
痴女即長成佳嗣已天伐粵惟大數來今古誰能越
哀我垂白親誰與慰時月兒在鮮安康兒死將傾蹶
感子柔順姿凡百已力竭黽勉温飽間母令宿心歇
九原雖弗知英靈自旁達期子以來世同生更同穴

贈萬斛

我病苦經歲往來無故人感君時問訊涕淚滿衣巾
丈夫處人世何異水中蘋所以古狂士各自重其身結
束事明主詎為卿里珍去住各努力不在要路津

謁綠野書院

吾道本昭晰誰為岐路漫攬衣拜祠下悠悠起長歎
先生起郿塢挺然障頽瀾講道綠野亭學人得大觀
遺址沒兵燹興復亦屢難別茲忽三載踪跡緝微官
去國但今夕登拜宴茲壇歲華奄已暮朱光耿難扳
努力徇往訓諒能趨所安

長寧留別錢送親友

悽悽去鄉國悠悠天一方感君遠相餞此情安可忘
長寧有美酒願言酌千觴心悲氣自結頽醉志彌傷
久要如不棄慰我以周行

咸陽谷濟元家宴集

昔病卧床褥感子獨憂思咸陽對君酒劇飲欲千卮
猗猗窗下蘭霏霏雨中絲相值不相樂君看園中葵
華州書懷

欲去不可去欲歸何以歸悽涼岐路下事事與心違
九月出門戶仲冬仍依依時命苟不逮百念轉首非
山凍萬石齒風雪千里飛半世逐萍梗何時能息機

華州對少華山

凍林夕陽下山色轉來翠回峯歛若飛曲磴轟將墜
灑氣發山足泉聲響堂庑別此何日來展轉起長喟

華州寧山寺作

我來華州城羈縻已彌月百憂結我腸展轉那能
徒聞少華峯安得至其樾今日忽言邁良友咸趨謁
指點寧山寺竒瑰實超越下道百步遠怒石如標揭
前趨路愈難轉深轉如鉤中立俯來處泉石亂如趙
突碑及沆浼似欲作齧齧山底方見山真與上帝訐
回壑出松濤怒吼后土紉曲磴轉蒙翳我行已力竭
入門睡益寬韓衛若倏忽相當太華巔應是盡溟渤
往時驛道松看看細如渡山僧陳寺始自古氣不伐
鎮茲少華山百脉如扣軋地盛物自豐願爾安能剪

并堂接廣筵籩豆紛以烈能優列絲竹音聲何清發
感我山林思苦茲千里趨朋友具執手慙慙欲空醜
追維在州時懷抱日以輓愁多病益侵佇立空餘骨
歲月去不回人事如飛鶻今者不相歡柰此逝者汨
日暮分手時撫膺有餘咄

潼關早發

早發潼關道微風動林木長峽百里去我行正僕僕
大風變頃刻萬里慘以逐樹杪聞過沙何須問平陸
我口不可開我身只匍匐輓車兩少年行行亦長哭
云是閩鄉人先世有官祿縣官急邊糧十戶九逃伏

里長利賂錢我故苦獨速太平作男兒庸調天亦福
所恨身不長筋力易羸感母寡已十年蕭條但空積
有田不得耕有事在忽倏近歲嚴轉輸使者日三復
迢迢百里途如歷經緯軸我嘆亢如火我行迅如翻
吏來督我行躍馬恨不驚使者討押錢鞭鞋褫我服
我寬向孰陳我淚向天瀑語終心益傷轂吞色猶慙
我感少年語涕泪泣如漉 皇明百年來萬姓各康
育艸木亦有滋少年爾曷願匈奴二三載驕氣如鸚
鷓主將小兒行焉能辦鏃鏃尔居見尔難不見九邊
族一夫八人管剝削盡膏肉往者禁軍出人家無完

蓄膂力代出役瘁敵內供穀土炕亦見奪何況妻與
僕此本亡賴子亡命入軍牘三帥皆詭隨安知有鈐
束少年尔莫若 主上正恭穆行當致雍熙邊庭永
安肅尔身當不勞尔家亦永復少年感我言再拜向
天祝願 主萬年壽保我有饘粥願民如春艸長養
無踐殞輓車向西去氣色稍睦睦

峽石逢正夫武選

日暮駐硤石故人欣在驛我手猶鞍豚君堂已開廣
佳殺芬以繁旨酒清且碧地僻山更深凡百豈易索
岐路倦客心相逢念疇昔鄉關君日親風塵我方劇

依依忽夜分頽然起巾幘

馬三丈於懷慶晏子

堂下鳴絲竹堂上泛壺觴依依千里情燦燦燈燭光
盛時易徂謝佳會安可常北風起晨夕行子感故鄉
旨酒旣清苾籩豆復芬芳願言共今夕期以莫相忘

劉安陽克紹畫錦堂宴集同敬夫翰長聯句

三冬盡行旅萬里黯愁色鄴城歲除日康虛堂燭明
夕相顧意轉親王相憐路還亥魏公真子師康歐子
豈公敵宿志凌臯夔王平生本沙礫敢擬此飲歡康
獨切親闈憶驚心雁北歸王承顏意西極文名重三

檢康時敬夫與藁城石邦彥內江劉德夫俱為翰林檢討有文名世稱翰林三檢云云交情媿聯翼雕蟲藝何貴王積玉光豈鍾逝波嗟不回康寸陰良可惜宴言重微陳王同君永明德康

鄴城同諸公於趙王府宴集

新春淑氣回賢王開邸宴金石懸前楹賓客萃別殿歡樂難具陳日夕意彌善嗟彼七子遊萬世猶欣羨朝退避雨沈澄甫逆旅就酌

冒雨過君舍君當為予沽問君今幾月不與人提壺旨酒不在遠但與相親娛百歲若一瞬可為塵事拘人非王子喬不飲胡為乎

夢故鄉親友

遊子苦萬里感歎志彌傷齋坐日方午幽思積中腸凌逸出戶牖委曲仍登堂親友坐相與斟酌倏千觴志意甚浹洽笑言復悠揚覺來意忽忽不知樓帝卿朱顏既難駐後會未可量隔窓撫園葵零淚霑衣裳

即事

錯錯復錯錯與子寧相薄投我以網羅嗟嗟今則那似今且猶可非今將若何

樓上曲

秦女鳴秦箏絃悲調復清今日風雪至即在涼州城

雖是涼州苦還家那得寧

同段德光夜酌

白日西南馳人生直如寄芳林春風發百物暢以萃
君心諧金石良晤成斯醉于焉靡歡洽倏忽老將至
孔跖今安存何須辨真偽

雜興二首

故鄉杳無際山川亦悠哉既非遁世徒而豈濟川才
竊食避耕織對客倦襟懷曲枕日當午悠然南風來
耿耿孚所願何必凌雲臺

其二

潁西亦嘉勝日日有襟期田漁俯川陸葵藿滿堦墀
野叟遺濁醪嘉樹過涼颼微醺上崇巘遐眺引東菑
牧笛風外來園禽鳴別枝睡足發新懷此心誰得知

觀漁梁

直西漳川水水暖有魚遊僮僕值農隙揭梁漳川頭
壓石作深溜刺目避湍流欲辭餌鉤厄反為曲簿留
願為梁上死不作餌中收梁上死何惜所畏餌中羞

辛未元日

昔構潁西宅今此遂閒居崇原羅縣牖交河帶蟠墟
徘徊增襟槩眺望引樵漁歲首馱人役駕言暫紆徐

悠然歌考槃茲樂誰可如

觀刈麥

五月麥已黃宵征許西曲婦子借我行共欣土膏沃
一畝穫滿車刈丁訝相矚削藉反田野此外更何欲
糠粃所不馱嘉穰况已足笑着場上積何不引醅醪

窮居

窮居鮮人事田叟過相於歡息稼穡好酌酒復嘗魚
醉坐碧草間偶然念園蔬斬竹架瓜瓠壘石堰流渚
清風拂面來襟懷遂清舒徘徊夕陽下中情誰復如

懷呂仲木胡孝思兩君子

兩生皆時彥並鳴絕萬人悉以兄事我何異骨肉親
呂也卧不出胡亦遠辭秦間關蜀道惡棲遲清渭濱
盛世需豪俊此物惟尔真不謬被罔遂憂國慨餘屯
心壯義自激道厚履彌珍同惡我不誣足譽人所嗔
徒有經濟策安能及斯民甘為螾螳賤不嫌苴土塵
傅生在墻堵尚父住磻津孤懷有誰竟念尔益霑巾
離詩二首答東岡先生

中道值嶮巖積歲橫昏霧淹留各有因慷慨懷往度
蔡生奪九錫皇先抱孤素隱顯迹固殊芳芬理誰誣
弔景增遠悲捫袂益深懼意氣精靈施馳騫瞬息故

堂山集卷之四
春言謝茲後啣杯玩芳樹

其二

賈生際昌運獻納鮮不摠志士具鴻達要之有所如
斷羽無騫翔決水無廣渚雖富萬人俊棄擲同土直
衆女自為妍獨樹終見屠時徂急奔箭裹結鬱膠淤
君門萬里隔安用苦躊躇

聞王敬夫消息

敬夫當世俊高義人所知運徂被罔逐光謝蒙厚疑
未飽壽州飭尚蒙妖豎嗤抱芳竟長歇悲彼團扇詩
西城冬十月與子並轡行宛轉護主意鑒者天上星

天星永不滅君懷豈復停濯濯白縠裳矧矧當凶女
顏如春花鮮音如青鸞語解舞燕代稀能歌齊趙絕
自謂可君心君心一朝別空房悲獨知百年祇長咽
有所思

晨起望歡來日午歡不至薄懷雖自勤邀情君已異
擲此玳瑁簪脩被雲霄翼高飛摩蒼天低飛盡溟渤
或底仙人丘或止王母關食玉求長生乘風討幽歇
芥蒂非所佳安可使中竭

暮春與張朝聘雨中夜坐

膏雨秀時麥蒸雲迷遠村冲抱本濟物虛襟久含温

瀟瀟見長蔓侵幌喜交痕天地自廣育朝廷原獨尊
寇盜枉壘粉虎臣如蜂屯明日首夏節開霽見暘暉
君况留侯喬偃蹇待高騫宿質應弧矢今志畧鯨鯢
馮唐終上論甘茂仍有孫憑君拭雄劍早晚清玉門
歸自長寧道中懷子衡

飛飛麗高蓋望望指榮木蒼岫迴遲光巉原帶交陸
翩翩獨歸翼翼堂堂君子轂昔瞻眷已深今欵心具服
彌節欣旦奭微言薄虞穆丹鳳鳴高岡駑馬飽首宿
枉訊慚久要遠別強新漉再晤安可知遐往每中熟
羨爾心迹并嗟予岐路鞠抱歎煩廣宣劃穢冀長劉

胥此相思憂我曹志有畜

在潯西別業聞呂子仲木見訪

絕世閉丘壑故人天上來喜劇跨驢出還以夢寐猜
昔遊背鄉邑出入唯子陪金閨白虎闥紫陌燕雲臺
繁華瞬息邁會晤轉首乖君才超且逸遠追周孔匹
緝學曠代稀陳猷萬夫慄國步茲少艱微君在良弼
龍臥空兩春梟鳴已終日何不疾命駢令此星運謚
瓜瓠豈宿心齷齪本故質甘為市井羞敢匿君子恤
今夕復何夕子來問蓬華方深和寡悲安知酒滴絀
呼童捉雛雞喚婦修品食但得沾笑言午夜詎終極

同仲木謁后稷祠

凌晨並邁謁履和想延休徂勲超鼻代功績啓成周
道厚往自迥本盛芳故流秉文羨清頌徧德欽雅謳
遐景詎有邁鴻烈曾未劉遺封藹餘化閔殿錯端旒
報享旣敦穆瞻仰益虔修食德乃不淑涕言愧茲疇

同仲木謁橫渠先生祠

覽眺陟雄壘欽訪降周原蒼松翳廣殿碧岫當崇門
氣暢百形麗跡勝千古尊繫昔此夫子壯志等崑崙
折衷旣罔謬為道久彌尊微言亦屢示至德要獨存
悲哉跡日遠邈矣述者繁精英顧莫逮糠粃寧可殮

講嚴理益晦源涸流豈奔幽懷每長喟景穢言復吞

二月二十八日同呂子過武水聯句

東行陟崇阪言念澣西曲仲木萃律先後圍盤紆古今

矚層波滉暎景德涵迴瀾薄山足川柳柔以颺仲木岩松

蹇而撲白鷗亂浮汀德涵黃鳥矯出谷歡來千日輕仲木

事徃瞬息局勗哉詣精理行矣慎遐躅德涵尊酒春山

中何時復相屬仲木

雨中獨坐三首

微宦博群口理棹返柴荆迹枉徒自厚譽寡誰見明
接纓歎沮溺種瓠笑東陵旭日陟臯陸因之眺園英

雖非素心賞聊寄千里情

秋雲澹空碧細雨濛高墉茅茨苦蒸濕百川復騰沸
蕩漾既有時昏墊豈無謂撫景傷故思環堵發蒼卉
酌酒鮮同侶岑寂何以慰

昔往愛驚翮今逝惟垂翼豈圖礪上遊固畏雲間弋
事謝形自休光淪體應匿賈生赴長沙張騫問西域
情好良有因百尔係所值

扶風道中

則藉喜康歲蓮河遊嘉盛年遄車詣岐縣訪舊嘆古賢
牛亭當秋樹潺湲鳴澗泉序清景茲倩節返理誰憐

感物意彌劇撫已情益煎弱齡糾王役拙宦謝膏田
束縛豈人力蹉跎信時褰已深隱者志寧負遊子篇
迹遠心自寂道厚行乃安初發旣超豁恒往諒難攀
迤迤阮生路鬱鬱謝公山彈琴寫幽曲撰杖凌紫煙固
窮倘身畢慷慨為世傳

新寨佛堂東楊子

仲秋霽潦歇天宇含清明伸抱得孤邁覽景遂閒征
巨原連蒼岫交巘映迴岬轍因懷賢軼情以眺古并
義深賤尺壁芳似薄兼程日夕客當至晤言揖君庭
明明天上月熒熒庭中鐙昔遊猷紛擾今會喜澄清

時萬迅流矢款協媿聯纓開尊豈須滄感序激深傾
王喬竟虛妄彭祖亦空名至願苟勿輟烟節孰能櫻
過馬援廟

騰轂仰三輔遨遊欽兩君散殖見昭義辭賦寧泥文
超思隗竟矜厚枉孰與陳徒欽語种事未測戒子云
秋風歷茲邑古廟鬱叢榛遙拜愴未入高芬遠彌新
事潔又誰誣迹勝光豈淪懷風寔有素酌土塹後塵
慨彼際明后亦被群口紛嗟此踈遠士嗷嗷空殺身

扶風詠懷古蹟

靈旣靡赫秦謬日以狂吞噬抵窮海兼併况要荒

昌德茂不作詐力遂縱橫幸來旦與少事去根蒂亡
本乏建國理安用傳緒長迢迢茂陵道習習谷風涼
川原慨往迹堞址愴遺疆拒胡豈勞遠覆宗良在強
磷磷太白石歷歷頌聲揚再傳已莫守世萬誠可傷

步出城西門

步出城西門冠蓋何纍纍鈴鼓震天闌旌幢溢街市
千官若聯雲群貴如聚蟻觀者肩相摩唯恐趣不駛
借問趨何為勅送名妃梓梓宮發東府靈伏已玄里
憶昔景帝朝妃侍深宮裏繁華人豈如富貴世莫比
白日陪燕遊良霄奉御几親戚俱豪華瓜葛亦稱倚

今日歸山丘徒羨盛儀軹至親誰復存繁華難再齒
玉珮重泉封悲風白日起松楸任後長未訣愴今始
苦寒行

朔風披六衢霏雪帶周廓栗栗墜素膚嘖嘖悲鳥雀
我行尚千里長此將焉托

至終南

衝泥抵終南迷濛失山色遙望太平空崔嵬白雲極
憑高矚村落嘉樹森森植此地素靈異氣候曷可測
旦日雲氣消嫩碧競環域綠草彌望浮波光與山逼
雙雙白鳥來滌盪千慮息宿性喜丘壑躋攀易筋力

深秋事佳遊長歌厭輕默早浼期卜築終以臥斯側

望神林寺

流潦浩無盡溷塗安所窮驟輿捷若羽鳴泉倏千重
招提靄曠陸烟火鬱修籠停驂慨將覽鞅掌那可終
何能載玄霍逍遙隨園公

西巖村

已達西巖村忽見郝村樹矇矓日未中慘澹昏雨布
積潦迷古泉白楊愴新墓華落不再揚景謝豈仍駐
所以遊賞思遙遙橫窳寤黽甘水坊彷彿空翠壑
笑語計宵軼瞻眺待朝曙心悰苟終愜何須怨遲莫

風

春來久不雨欲雨仍多風我自武功發天地俱塵蒙
行次少華麓颺號若山崩頓踣那可道歷歷辛苦同
胡不摧珍氣令此雨暢通倘彌萬夫望方欽鼓盪功
泛舟至終南

黑水旣瀰漫撰舟浮渭東新霽水波足告若御天風
方懽榜歌作忽見終南宮遭迴三十里轉盼即已通
陸邁豈不適舟行實從容安流解驅迫履險番有終
旣辭震輶後仍奏瞬息功因思駕赤鯉直叩蓬萊峯

東原瞻眺

積晦乏佳况瀕行欣霽天川原鬱含翠村落迴浮煙
流潦漸已盡徐風澹相牽雖無惠連詠尚意明遠篇
撫景生遠思覽曠感遐年志念未殊昔憂否忽成煎
悔迷廣成技空羨伯陽仙于焉恣遊眺庶以慰迍邐
敢循會稽僻異嗣鹿門賢大道本茫昧吾意卑草玄
同諸君於良璧園亭集答時濟

客行乏良思入座逸興生雖無管絃奏顧多慷慨情
烟蘿翳明月沼荷枯翠莖于焉感宿昔美酒為君傾
今日五陵下誰識田實名

壬辰元日

節序孟春屈子年欣已長撫躬耿不作行樂或已荒
昔壯志四海今憊愧五羊因心苟不蝕率履常益強
陶生柴桑里龐公鹿門場但使所思適百年安可妨
十月一日書懷
老去人事疎非謂懼寂寞有時忽小吟坐對南山下
今既不如昔後豈勝今者節物自相紹少壯安能假
頗思鍊雲英共結白蓮社

對山集卷之四

康對山先生集卷之五

五言古詩

同承裕升之過澣西別業

還耕愜初願揖世迈空林雖非志士理已獲靜者心
嘉賓青雲客枉駕忽相臨携酒共斟酌張絃揚妙音
義厚情自叶道合契滋深漪漪漳川水幽幽南山岑
相值不相樂柰此逝者侵

元日同諸弟宴東序

自我登科來倏已十三載芳臭吾所知堅白世仍改
感嘆謝
明世徜徉迹陸海本是葵藿姿敢塵

豐山集卷之五
廟堂采旭日照西堂歲初幸和變與爾共斟酌歡歌
益瀟灑果叶滄浪心安為塵氛免

朱升之祖德詩

玄馭往難返厚澤遠彌新因覩後人孝愈信逝者仁
琴聲宛在席鶴唳如有聞徒勤翠枝想誰傳素空陳
名章一為耀千古詎應泯

四月七日雨中同文浮山坐酌

初夏草木長鳴雨更相過來牟生意佳枝煥望如織
陽日不下臨此物終且蝕往者已已夏頗為旱乾戚
徂春苦無雨田疇生意息因懷老農語徃徃未差忒

窮居繁生齒所恃耕耨力明日更如此與君當惻惻

子卿泣別圖

廿年繫異國感別會仍艱置酒話夙管詎終千萬端
嘆息淚沾臆徒令摧肺肝昔為雙飛龍今為孤翼鸞
丈夫耻微諒况爾烈士顏躍馬窖上別欲歸中自難
徒切報主恨安悔軍吏言勝負有微數奮勵心所安
所以君子人不處嫌疑間

贈用昭

宿志苟如此何足言棄捐賦性本迂薄長遊適茲年
雖被群口絀尚慕夷惠賢秉耕事場禾同俗謹方圓

杯酌取適意紆肆無昔愆當階植葵榴穠艷亦堪憐
賓客時屢至行樂鼓危絃擊牛旣不易烹飪有時鮮
微醺步幽隩清歌凌晚川念子有佳興影然詣吾阡
並坐話茲事古今誰比肩皓首不努力世萬安可傳

近山尚書莊上

春風纈芳林虛堂翳脩竹苟愜靜者心寧慙世人目
昔予懷此遊悠悠幾更宿豈期聯輿來沉醉卧茲曲
高歌嘆往蹤遐眺覽前躅主人古司徒雅興薄裴陸
但能永今夕何憂乏醅醪

哀王朝列

先入寓南都朝列實所厚素欽清淨懷豈但通家舊
博才與世違高風實難圉挂冠國東門饁稼灤西墅
仰憤望天雲扶筇步孤嶼自謂羲皇人豈但貪可吐
隱居四十年仙輿竟長舉松栢翳窀穸叙述徧寰宇
微辭陳久要匪直慰儔侶雖乏桂酒陳或擬吳陵楮

哀王中憲

中憲有俊才我自童子知詞源馮三峽豪氣凌九涯
少年取高第倏致清要司糾謬竄群枉問俗正 皇
規秦越及幽冀至今常見思驚風無寧翼喬木有樛枝
外臺早見擢長意浩無期勁節挺不改直道耿難馳

遊屈萬里翻名遂千古竒往哲俱如此於君何復疑
敬讀復齋稿惻愴有餘悲

悲哉行

拭淚坐永夜角聲一何悲羅敷有心事欲語復思惟
徘徊掩鸞鏡迤邐卷羅衣初為君家婦貞潔有容姿
今年二十五不意被君嗤娶妻以嗣續豈如陌上兒
問君後房妾詎不知今儀熙陽萬芳啓嚴寒忽凌漸
節物尚改革人事奚見疑微辭陳君前寒暖君自知
願言欽令德毋為後人疵

短歌行

擊鼓會佳客秩秩滿中堂齊娥揚妙音越女奉微觴
良時不重至此樂亦豈常倉庚枝上鳴鼠婦來我牀
節物日以感人事安可量感慨立前楹翫月步周廊
昨日一何壯今日一何尪展轉意彌劇惻惻遂心傷
探壺取旨酒斟酌夜未央嗟我同懷人戒之慎勿忘
思歌行

樂事弗重至好會難屢常當杯不歡飲其如後者妨
有田不種粟有園不種桑坐待飢寒迫空令聞者傷
易歌行

良時苦易失好花不重芳襄首待富貴白日忽無光

有酒即斟酌尚恐臨事妨如何市井徒心志不廣長
儲金望成埒積粟望成岡志願雖償愜歲月安得常
力瘁神乃去忽然斃中堂有粟不可捏有金不可將
平生豆羹較况肯厚死喪肉為螻蟻噉妻子無憂腸
結交邪枉客志意各飛揚馳馬復聞鷄絃歌夜行觴
百事比先健行步如雲翔景屬此曹好事留居者愴

寄伯循

秋風西北來偃蹇坐茅屋四壁無纖塵當牕有書牘
不問坐者誰啓牕再三讀一讀意已駭二讀見裏曲
憶昔年少時心志各有蓄不意謬通籍先君被薄祿
朝夕望君起如彼饑者殺我已罷館職君方隸官祿
味苦不可人旋車亦何促

主上堯舜姿舊章理當復平生稷契心豈為世情覆
尚期謹藥石慰此百姓蹙予也素蹇劣茲志每中熟
以乏涵遜懷幾構邪罔獄顧影苟不虧於道果奚辱
山水性所嗜喧恢豈吾欲屈指君歸來三年但忽倏
人生不滿百激勵在初服可似山中人志機泛醅醪
示昭胤兒子胤讀書學文駿可上達然頗事遊
冶玩愒歲月乃以此示之

勵志貴青春登途謹康歲簣土可為山所戒在紛戾

努力不自茲老大竟何濟

有感

曾參不殺人魯連蹈東海志士各有懷肯為塵氛浼
細吟獨漉篇長歌楊之水采薇首陽山吹簫洞庭匯
但使心意舒何憂世瑰磊

讀史二首

鴻雁不老越蛟龍不潛岡平生志嘉遁佐儲抑何狂
因嘆務光輩惻惻令心傷傳記尚溢美其言或荒唐
嗟彼高帝業赫赫繼三王孺子安所見胡為遽辭商
契會視豪傑出處聖所詳感嘆擲其策願為史臣張

其二

天邊有黃鵠高飛一千里烈士耻庸節世事特敝屣
朝辭上東門莫從赤松子感慨風雲期超悟往還理
進既有所因退亦何所倚獵犬貪兔狐不免灶傍死
富貴多嶮巖英雄如螻蟻所以明哲人窮達重狗已

寄温民懷

幼小擅文墨老大轉崎嶇相逢金臺下飄飄神仙質
當時各輕忽領會未周悉但為語咲喧未究風雅實
竭來坐幽壑默默思往日始知逸興多况哉予所匹
去年季春初君來過蓬華情翼千里先會以頃刻失

雖承枉書札心竊負羞懼時我在羨陂嘆息使心悵
 繫茲十年別朝夕宛如一秋雨賓客踈翻書檢名筆
 緬惟君子義不語但首疾丈夫蔑小嫌英雄重身畢
 憶管京華秋慷慨難具述鴻毛視富貴萬類若捫虱
 唯君知此心往往談道術戊辰抵丁丑倏忽周歲律
 狂歌窮谷間可為形影恤譬如籠中鳥得放返巢窟
 豈有依世心更為稻粱出寄君聊共嘆世故風馬逸
 用昭東歸華山率爾有懷二首

鳴鞭指華麓款駕越涇川逸興既滴蕩麗景忽見遷
 翳翳南山齋遲遲西堂月絲竹滿我前清商與誰發

其二

十日忽言別良晤何時再握手坐君堂如飲雲中壑
 披意唱新語頃夜理微辭開帙動成趣何時忘令儀

首山行

我從華陰來逢君長安陌長安車馬多客心苦逼迫
 感君夜沽酒翩翩話疇昔倏然若翔鳳萬里寧可搯
 世儒正齷齪從誰覓風格首山連華嵩古謂黃帝宅
 君固首山人結廬值其脉佳宦縮銀黃素心羞烜赫
 恨不策杖遊憑高倒巾幘激泉引綠水微歌坐玄石
 但使幽思成肯令芳意隔昔在京華日羨君神氣適

頗似仙人儔，邈與世氛革。瑰志終靡違，炯操竟難踈。
因君起永嘆，豈是山水僻。聖化被流沙，萬彙具豐溢。
均彼適性歡，敢念別群惜。歲月同逝波，生理異驚駘。
碧樹茲已長，蒼苔疊如繹。會當詣嵩麓，因君訪周易。
贈彭尚書濟物北上三十韻

明興十三紀，逖德唐虞速。歷世具徽美，奉天無罪尤。
孝皇昔在御，四海有餘休。深仁被遐邇，厚德孰與侔。
暨我 毅皇帝，聖智天所庥。雖有群豎狎，尚匪新
政羞。諸公大乏理，怒目如電遒。遂使蹇讓禍，幾為宗
社憂。瑾永遯，澎湃寧彬遂。紛浮骨鯁日踈遠，昌言誰

見收功德反，摧挫屠沽皆。列侯大起疆，圍事巡幸經。
五秋豈但轉，輸苦尚多羅。織愁速繫盡，九族勘覈無。
一讐天下若，鼎沸誰能善。身謀仕宦自，相好山林皆。
寄囚未可保，朝夕况復尋。昧遊我 聖起南服，巍

巍舜禹儔，立斷四凶死。倏建萬世猷，勤渠覓元老。奮
迅康八州，詔書許更始。生靈免虔劉，夫子臯夔徒。素
心景伊周，窮居志萬古。勘定九幾陬，青史不輟紀。
先皇仍見優，勲康塞人宇。簡在蓋天誨，感公過相訪。
愧予矐瞽流，安能達大雅。聊以序民幽，黎婦不恤緯。
君子宜有求，肇遊旣感慨。莫節應曠脩，吾非兒女子。

安用歌別謳

詠懷

窮居無別悰掃徑揖清靄濁醪自斟酌幽花復芬馥
雖微恣性歡亦鮮迷津慨寒虫相續鳴潦水參互沛
節物漸以更人事紛相代猗彼巢由徒曠音昭物外
德克弟至

飄飄神仙姿悠悠燕秦道飭車纜幾時倏來慰孤抱
烹羊醺新酒朗吟對穹昊苟遂酬勸歡安知詆叱懊
烈火鑠良金光燦久彌耀南園松菊長東泝蒹葭老
且將終日遊續我蘇門嘯

清溪老人歌

托廬楚山下復愛楚水清因為清溪人常歌清溪行
激波混朝霽玄湍澄夕泓理靜百穢徹道在千載貞
前流遠彌匯後派長且榮探花服初始沂瀾欽晚生
願申得一勸永保世萬盟

長寧望先塋示諸弟

逖哉世德烈遐矣徽音暢及予蓋九葉遵道敢孤曠
雖微宋臣述豈肖馬生誑冠裳西冠雍文采遠慙向
松楸麗茲原芳馨載宿鬯事以久方白德顧遠彌亮
鼻祖履何長遭時實骭髀雖抱風雲姿聿敦畎畝艱

洎我西原公造詣益高尚蘊博陋邕泰光霽跨籍場
裔視鄒魯真德校務隨妄再世具敦穆流慶殊豐盛
明初生達人康濟古無讓旣樹宏遠規復慎豐亨嚮
勛業動神后名德懾虜將因心謝茅土遜志抑浮浪
逶迤及茲辰瑰瑋未凋喪食粟思天功曳履念哲匠
昆弟各有懷簪組匪吾上惟能樹德音斯可副玄貺
翼以寧乃狎波以激斯宕國之千祝延宗鮮百年亢
譬如西頽陽轉忽見悽愴猗想平陵侯傳世一何壯
封拜歷累代烜赫據光望荏苒至皇明誰能辨後壙
盛衰本天道昭格良有狀拔木不再榮熄炬鮮重炕

殷懃告來裔黽勉責昆行願言諦茲篇用述吾宗侶
得弟德克書

憐爾萋斐人遠滯巴子國素心仍起羞遜志果安得
此曹父麾霍睚眦動成慝何若返南川同予醉秋色
徃盤屋訪王子明叔

駕言詣春衢南徃遂良覲嶺雪旣消散惠風復披裊
羲陽啓朝輝垆野喧牧笛豪遊意益暢嘉賞事方述
撰杖陟崇原載酒望迴壁懷人志丘壑夷險久經歷
豈卑平子吟聊儼毛生檄隆念困靡革德音近愈怒
采苓南山陞弭節聽泉激期君畢莫春庶以慰孤僻

燕明叔東亭子

嗣歲集高陵良晤傾古昔今晨燕蓋屋逸興更超奕
雖無絲竹陳幸對風雅客酒酣幽興發至論光綺席
子本素心人抗志陋鄒嶧蠲潔物莫染磊落俗豈格
碩言念久要百歲以為遠

蓋屋喜太微至

此日復何日眷言會君子方擬策馬尋忽焉具來止
來止將何為握手論古史春城沾酒佳斟酌一何喜
普緣古仙遊山水嘉無比若賦南山篇請君自茲始

馬融洞

昔賢托茲室討探故高尚清泉室外淙縈瀾壁中漾
徘徊坐石側殷勤發幽唱白雲忽苦飛青巒益脩亢
何能棄塵氛卜築西巖上

石上小酌

泂流歷層壑攀蘿下迴磴雖有芳草心未博遠遊興
沉瀟愕中流截業怛旋徑酌酒坐石上夕陽更輝映
薄言呼兩君音響動相應始信空谷聲果叶靜者聽
酒酣連袂歸悠悠心靡定

許西喜明叔孟獨二君子過訪

我本支謾人嘯歌許西曲心喜談道術性憎傍塵俗

二君英俊才世事豈拘束同遊終南山文采奪人目
數日返墟里此意常在腹因念蘇與黃轂臭一何屬
我有輞川吟鄙近不可讀請君勉和之未為此行馥
漆川西游別張子太微

送君漆上水忽見太微峯勝遊苟如此佳期難重逢
君今入盤屋且坐五老峯待予明日至同與玩仙蹤

發車

飭駕詣修陸乘和訪幽徼匪答阮氏招將追碧山峭
積歲苦囂紛芳春忽登眺志意旣參叶心賞故俱妙
雖微盤谷吟聊嗣澧陽嘯

下經臺書土地祠柱

昔同王子來坐此眺林谷今同王子來探杯坐樸藪
良覲無所乖佳興益飄翛悠悠西日沉倉翠奪人目
於土地祠廻磴望太微峯

陟巘下廻磴夕陽試拭日逝矣發幽思翩然媿巖谷
激泉暗松濤惠風襲春服因嘆支謾人世事安可瀆
上善池碑陰走筆

一登老子臺佳思忽萬里降觀上善池野坐彌可喜
同懷旣靡愆橫飛安得止東谷古仲雍太微近平子
慇懃遞璫章磊落動幽思黽勉事追逐倉皇媿迂鄙

感此冲抱清益令虛襟起旭日鳴煩禽春風發芳芷
中情何所櫻逖景尚堪倚繫彼逍遙篇慙爾柱下史
寄題高德章微齋

達人志玄圃所蘊故高尚發腴見烟迹耀靈覩幽韞
往訓從古然近思匪今諒昔遊懷德音邇會服佳量
安得坐君齋惠言削浮妄

同楊宗文張用昭南齋小酌

幾年滯憂否嘉賓事彌薄覽君芳草篇益想雲安作
旭日發青昊遊蜂拾花萼張絃動微吟含杯總堪樂
願言盡今夕且示滄西畧

遊觀田園

嘉木蔭高堦遐賞適茲辰覽景意如挾矚物思彌珍
雨時群植茂氣爽萬慮新瓜瓠溢畎畝葵藿滿庭墀
飯糗顧豈革伏櫪志先馴苟無采薪厄尚勗脩更論
於高陵壽明叔初度

為薦呂夫子因之涇渭川中道遇來使慙慙出素編
久知滯王役不謂會此廛晴春懸明月惠風乘遠天
木末雙輿至迎我城西阡握手但相咲恐是夢寐然
宴我旅人舍坐我紫綸羶童子出名酒飲如鯨吸川
請君好自慰聽予南山篇

長安卧病

積歲乏愉情中道值新疾省運誠有愆撫躬良未密
親友念久睽相覲肯輕畢開燕集妖冶揚絃奏瑤瑟
淑音旣纖柔醇酒復洋溢中性欲蠲飲難可遽揮叱
陶生止酒篇稽康養生術徒切恟恚憂未究裁省實
天命倘不乖吾去小酉室

病起

攝生乏精理沈宴櫻厚屯親交幸相慰稍稍就盤飧
少日志夷曠中歲辭帝閤自謂富筋力足以貴丘園
擷英浥流瀨登巘望朝暾聿覽九峻瑰兼躡崑崙根

河華晏經涉韋杜時扳援薄緣竟終惠邁思往無鞅
緩步庭除下麗日照西原蟄虫相續飛客亦造重門
咲語雖可挹拍塞竟還吞明發具春服庶幾試匏尊
志願果不抑留滯何足言

晴

此雨已經月積陰數難悉况及仲春初沉沉若冥窟
天道黯莫曉人事邇堪栗展轉思古人憂來卧蓬華
泐隙發微暉過午見烟質喜已憂復生雲氣倘再失
神鳥不自翔陰翳遂驕逸願帝命風伯掃蕩耀兹日

答仲木

堂山集卷之五
十四
適性卽為樂處安寧然貧客來遺我書乃在涇水濱
再拜讀此書道意何慤慤昔為鸞與鳳今為參與辰
相思千萬端綫綫難具陳浮雲蔽白日遊子殊苦辛
道遠行不易感惻傷我心

送承裕

雞鳴日未旦君子欲遠征徘徊執我手慷慨有餘情
逝水咽不返後會安可營行人盼前路斯須聊逢迎
良晤既靡易壯志當見明秋花各自好噲室誰與楨
憂來夜不寐揮去怒如橫希聲已寡和芳意安所傾
願秉清忠節與世傳令名

十四夜見月

城上流清輝照我清桂窟坐久忽思眠柰此筵前月
秋風吹我衣依依幽思發客散坐中庭彷彿見珠闕
惕然感故懷達旦意未歇蟋蟀相續鳴蒼苔白露滑
素光千里同佳人隔秦越豈無琉璃杯心腸為誰竭
初雪有懷

贈石泉中尉

寒風翻雲氣雪片漸細微忽忽抵簾幕冉冉近人衣
已深博山想更念剡溪歸安得孟夫子同眺碧山磯
我本山海人宿志愛泉石繫自逢此泉坐嘯忽日夕

對山集卷之五
清淨物不緇涵蘊靈所藉發源本天潢引注故澄碧
泠泠帶紫房浩浩湫今昔靜虞苟中愜逖往益輝燁

送袁解夫還盤屋

吾愛袁解夫飄飄古狂客勁風凌千人高情協金石
雖爲羣小排豈繫丈夫厄自古浮天雲焉能蔽白日
酌酒發浩歌憑君永今夕

對山集卷之五

